

VENDIM
Nr. 173, datë 19.3.2026

PËR KRIJIMIN E BAZËS SË TË DHËNAVE SHTETËRORE TË SISTEMIT TË PROVIMIT TË SHTETIT DHE PROVIMEVE TË TJERA TË DIGJITALIZUARA

Në mbështetje të nenit 100 të Kushtetutës dhe të nenit 4, të ligjit nr. 10325, datë 23.9.2010, “Për bazat e të dhënave shtetërore”, me propozimin e ministrit të Arsimit, Këshilli i Ministrave

VENDOSI:

1. Krijimin e bazës së të dhënave shtetërore të Sistemit të Provimit të Shtetit dhe provimeve të tjera të digjitalizuara.

2. Institucioni administrues i bazës së të dhënave shtetërore të Sistemit të Provimit të Shtetit dhe provimeve të tjera të digjitalizuara është Qendra e Shërbimeve Arsimore.

3. Të dhënat e kësaj baze ndahen në të dhëna parësore dhe në të dhëna dytësore, si më poshtë vijon:

a) Të dhënat parësore të sistemit konsiderohen të dhënat e mbledhura nga Qendra e Shërbimeve Arsimore, që kanë të bëjnë me:

i. rezultatet e provimeve të shtetit dhe të provimeve të tjera të digjitalizuara, si dhe përgjigjet e dhëna nga kandidatët për çdo profesion/profil;

ii. fondet e pyetjeve dhe testet e provimeve të shtetit e të provimeve të tjera të digjitalizuara;

iii. të dhënat për praktikën profesionale dhe për licencat për ushtrimin e profesioneve të rregulluara;

iv. të dhënat mbi vlerësimin e dosjeve të kandidatëve për provimet e shtetit e të provimeve të tjera të digjitalizuara.

b) Të dhënat dytësore të sistemit konsiderohen të dhënat që merren nga Regjistri Kombëtar i Gjendjes Civile, Regjistri Elektronik Kombëtar për të Huajt në Republikën e Shqipërisë, portali unik qeveritar *e-Albania* dhe Sistemi i Menaxhimit të Informacionit të Arsimit të Lartë (SMIAL), si më poshtë vijon:

i. Emri, atësia, amësia, mbiemri;

ii. Numri i identifikimit personal;

iii. Datëlindja, gjinia, vendlindja;

iv. Statusi civil;

v. Adresa e vendbanimit;

vi. Shtetësia;

vii. Të dhënat e kontaktit të aplikuesit;

viii. Të dhënat personale të studentëve të huaj.

4. Dhënës të informacionit për sistemin janë:

a) Qendra e Shërbimeve Arsimore (QSHA);

b) Agjencia Kombëtare e Arsimit Parauniversitar (AKAP);

c) Agjencia e Sigurimit të Cilësisë së Arsimit Parauniversitar (ASCAP);

ç) drejtoritë rajonale të arsimit parauniversitar (DRAP);

d) zyrat vendore të arsimit parauniversitar (ZVAP);

dh) urdhrat profesionale të profesioneve të rregulluara;

e) kandidatët për provim;

ë) institucionet publike dhe jopublike, që zhvillojnë provime të tjera të digjitalizuara pranë Qendrës së Shërbimeve Arsimore.

5. Sistemi i Provimit të Shtetit ndërvepron me:

a) bazën e të dhënave shtetërore të Regjistrimit Kombëtar të Gjendjes Civile;

b) Sistemin e Menaxhimit të Informacionit të Arsimit të Lartë;

c) Regjistrin Elektronik Kombëtar për të Huajt në Republikën e Shqipërisë;

ç) portalin unik qeveritar *e-Albania*.

6. Institucioni administrues i bazës së të dhënave siguron përpunimin e të dhënave personale, në përputhje me legjislacionin në fuqi për mbrojtjen e të dhënave personale. Institucioni administrues mbledh vetëm të dhënat personale të domosdoshme për realizimin e qëllimit të bazës së të dhënave dhe provimeve.

7. Të dhënat personale të transmetuara duhet të ruhen për aq kohë sa është e nevojshme për të përmbushur qëllimin për të cilin janë grumbulluar. Pas përfundimit të këtij afati, të dhënat fshihen ose anonimizohen sipas procedurave të institucionit administrues.

8. Niveli i aksesimit të lejuar për përdoruesit e Sistemit të Provimit të Shtetit dhe provimeve të tjera të digjitalizuara bazohet në rolet e krijuara të përdoruesve dhe përcaktohet, si më poshtë vijon:

a) Qendra e Shërbimeve Arsimore:

i. menaxher përdoruesi sistemi, për:

i/1. krijimin e përdoruesve;

i/2. caktimin e roleve dhe të të drejtave të tyre;

i/3. kontrollin e veprimtarisë së përdoruesve, si hedhës e gjenerues i të dhënave.

ii. Administrator sistemi për:

ii/1. krijimin e sezonit të provimit;

ii/2. krijimin e strukturave të provimeve;

ii/3. ngarkimin e fondit të pyetjeve;

ii/4. krijimin e seancave për provime të përgatitura nga komisionet, si hedhës dhe gjenerues i të dhënave.

iii. Administrator salle për renditjen e kandidatëve për provim, sipas listës emërore, si lexues e gjenerues i të dhënave;

b) Zyra Vendore Arsimore Parauniversitare:

i. menaxher aplikimesh, për:

i/1. verifikimin e dokumentacionit të aplikantit për provim shteti, si lexues;

i/2. përgatitjen e listës emërore të kandidatëve, e cila dërgohet pranë drejtorisë rajonale të arsimit parauniversitar përkatëse, si hedhës dhe gjenerues i të dhënave.

c) Urdhrat profesionalë/DRAP/institucionet publike dhe jopublike të interesuara, që zhvillojnë provime të tjera të digjitalizuara:

i. menaxher aplikimesh për:

i/1. verifikimin e dokumentacionit të aplikantit për provim shteti nga zyra vendore e arsimit parauniversitar vartës, si lexues;

i/2. përgatitjen e listës emërore të kandidatëve, e cila dërgohet edhe pranë QSHA-së në rrugë zyrtare, si hedhës dhe gjenerues i të dhënave.

9. Në bazë të ligjit nr. 10325, datë 23.9.2010, “Për bazën e të dhënave shtetërore”, rregulloret për organizimin dhe funksionimin e brendshëm të bazës së të dhënave shtetërore përcaktohen nga institucioni administrues e miratohen nga titullari i tij.

10. Palët zbatojnë masat e duhura teknike dhe organizative për të siguruar një nivel sigurie të përshtatshëm ndaj rrezikut për çdo veprim në regjistër lidhur me aksesin, ndryshimin, korrigjimin, përhapjen e të dhënave personale, me qëllim garantimin e gjurmueshmërisë, të konfidencialitetit e të integritetit, disponueshmërinë e qëndrueshmërinë e sistemeve dhe të shërbimeve të përpunimit.

11. Vendimi nr. 741, datë 3.12.2021, i Këshillit të Ministrave, “Për krijimin e bazës së të dhënave shtetërore të Sistemit të Provimit të Shtetit (SPSH)”, shfuqizohet.

12. Ngarkohen Ministria e Arsimit, ministritë sipas fushës së përgjegjësisë për profesionet e rregulluara, Qendra e Shërbimeve Arsimore, Agjencia Kombëtare e Arsimit Parauniversitar, Agjencia e Sigurimit të Cilësisë së Arsimit Parauniversitar, drejtoritë rajonale të arsimit parauniversitar, zyrat vendore të arsimit parauniversitar, autoritetet kompetente të profesioneve të rregulluara dhe urdhrat profesionalë për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama